

14

1613

LE

188

PROTECTEUR

3542

DES PRINCES.

Dédié

A LA ROYNE.

Z.

17

M. DC. XV.

31/10/17

PROTECTOR

DES PRINCES

PROTECTOR

DES PRINCES

DES PRINCES

DES PRINCES

PROTECTOR

DES PRINCES

PROTECTOR

DES PRINCES

PROTECTOR

DES PRINCES

PROTECTOR

DES PRINCES

PROTECTOR

DES PRINCES

PROTECTOR

DES PRINCES

PROTECTOR

DES PRINCES


PROTECTOR

DES PRINCES

PROTECTOR

DES PRINCES

PROTECTOR



LE

PROTECTEUR

DES PRINCES.

A LA REYNE.

IL faut comme bon François, j'ayme les bons François, & que comme seruiteur des vrais seruiteurs de mon Roy, iespouse leur cause, & qu'avec eux ie face party avec le bien public, & grandeur de mon Roy: l'honneur trop le zele de nos Princes, de ces braues Princes, que mon cœur touché d'amour, & mon ame d'admiration adore en les voiant, & ne pense les voir assez pour les adorer, pour luy denier vn effort de ma plume. Et bien que le courage des braues n'ayt besoin de ces honneurs, qui se tirent sur le papier, & que par l'aduis des Assyriens on ne doibue dresser d'idoles au soleil, parce qu'il se monstre mieux de luy mesme que la main du maistre ne le sçauroit tirer; toutefois comme c'est le propre de lair embaumé de quelque bonne odeur de flairer soüeuemēt: il faut aussi qu'un cœur fleurdelisé, & battu sur le coing de la fidelité Françoisie porte au besoin l'atestation de son affection, ou sur le tréchant de son espee, ou sur la poincte de sa plume,

pour l'exposer aux yeux de tout le monde. Ainsi il faut que ma plume seconde mon cœur, & que come du cœur i'honore & embrasse la grandeur de mon Roi, que ma plume en mon zele face voir l'affection de mon cœur, & l'amour ds ma patrie en la franchise de mes discours. Et que puis que ie reuere le courage & l'affection de nos bons Princes au bien de la partie, que mon Anchre à la ruine de l'Anchre de Florence serue de tesmoignage au public des iustes intentions que ces braues ont voué au bien de ceste Monarchie

Et d'autant, Madame, que nos bons Bazancz crient que ces Princes, ces zelez protecteur de cest tst sont des boutefeux de nostre repos, & que vous, Madame, vous estes comportee en leur endroict en bonne mere, ie veux faire voir au public par vn veritable recit de leurs actions, qu'ils se sont tous cōportez en vostre endroict en bons enfans, & vous au contraire en lunon, en marastre: Et que leur saint zele ayant esté recogneu, & puis fauorise de tous les bons François, & Balanciers de la iustice, que vous vous estes esleuee, & contre ces bons Princes, & contre ces bons François, & contre la iustice, afin que le public iuge, si quand la raison est melprisee, la force n'est pas necessaire: Et si quand on se iouë d'vne Monarchie, & qu'on la veut gouverner plustost par passion que par raison, ceux qui ont part à l'Estat ne doiuent pas s'efforcer de conseruer par amour ou par force la grandeur de l'Estat.

Ainsi, Madame, pour commencer par les louables & zeleees actions de nostre braue Prince, de nostre premier Prince du sang: Et par les traicte-

mens qu'il a receu de vostre Maieſté, Je diray, Madame, que ce grand Prince ennemy du deſordre & de la conſuſion s'eſt touſiours moſtré aux François en bon Genie, comme Lampridius Probus aux Romains, & tout en feu d'amour, cōme Pallas paroifſoit en feu à Diomedé pour le preſeruer des dangers de la mort, a respiré touſiours la gloire de ſon ieune Roy, & fait voir à tous, que ſon intereſt particulier, n'a peu aller ſi auant, que le zele qu'il a iuré au bien public, & à la fermeté du repos, de là grandeur, & autorité publique.

Nous ſçauons, Madame, & vous mieux que nous, que ce bon Prince, depuis le premiere iour qu'il a eu l'honneur de vous toucher d'alliâce, & de proximité, a veſcu en voſtre endroiēt en fils, mais en bon fils. Et qui ne ſçait, comme à la mort de noſtre Grand Henry, de noſtre bon pere, il prit le noir, ſur les iours noirs de France reuint de ſon exil, non à main armee, comme vn autre euſt peu faire, mais la larme à l'œil, les ſanglots à la bouche, & la douleur au cœur, recogneut noſtre Dauphin pour ſon Oingt, pour ſon Roy, fit par ty avec l'interreſt de ſon bien, de ſa gloire, & de ſa grandeur. Ei en voſtre endroiēt que ne fit-il pas? & quen'a-il pas fait pour vous obliger à luy vouloir du bien?

Il a, ouy, ce braue Prince pour vous authoriſer en la regence de ce puiſſant Royaume offenſé ſa qualité, & trahy ſon merite, a eſté touſiours ſur le zele, ſur l'honneur, ſur le reſpect, & ſur l'affection, & vous tout au contraire, auez payé ſes bonnes volonteſ de haine, & de meſpris: l'aeuz deſplacé & priué de la cognoiſſance des affaires d'Eſtat

pour plaire à l'humeur des personnes artificieuses, & ennemies de la gloire de ce bon Prince, pour en laisser le maniment à des morfondus, à des ethiques, & à des Facquins, qui affriandez de ceste douce viande pour le perpetuer en l'excez de ce pouuoir ont vendu le Roy, l'Estat & la patrie: en sorte que l'ennemy de nostre repos, de nostre gloire, & de nostre grandeur est à la veille de moissonner le fruiet de ses ambitions, si nos bons Princes, & si les vrais François par la valeur de leur espee ne recueillent, & accueillent la violence de cest ennemy, qui sous vn sacré pretexte d'alliance accouit au trot, & au galop aux ruines de cest Estat: & si par leur sage & genereuse conduite ils ne mettiēt cest Empire, ce florissant Empire à couuert de ceste oppression, & ne le releuent par l'effort d'un masse & genereux courage de ceste prochaine ruine. Helas qui ne le voit? qui n'en crie & qui n'en pleur?

Mais encore, Madame, vous sçauiez quel cœur ils ont ces meschans demons contre ce Prince, quels, & combien funestes leurs artifices, vous auez veu, comme ces pernicieux à ceste leuee d'armes que la pitié, & la compassion des ruines de cest Estat auoit faict prendre à ce Prince, effrayez de la crainte du supplice que meritoyent leurs crimes: & voyans qu'il estoit trop fort pour l'emporter de hautelute, firent les cameleons, vous persuaderent de le gagner par des belles paroles, de l'endormir aux appas de l'esperance d'un bon amandement de nos mœurs, comme la lune ne pouuant iouyr d'Endimion l'endormit pour plusieurs mois, comme Iunon pour traualles

L'Hercule des Poetes faisoit malicieusement endormir Iuppiter, & auez si bien fauorisé leurs pernicieux desseins, que ce bon Prince, qui porte escript sur le front, ce qui est dans son cœur, qui n'a d'ambitiō, que du bien & grâdeur de l'Estat comme d'un patrimoine, auquel il a notable part, & qui a tousiours postposé l'interest de ses iustes plaintes au repos des subiets de son Roy, croyât que vostre ame & celle de nos bons Agnas, fussent de bonne mise, comme la sienne, que les effects seconderoient vos paroles, comme ses paroles n'ont iamais dementi l'effect de ses promesses, posales armes, ferma la porte à la rebellion, au desordre, au sang, & au carnage, & nous ramena du tristeliēt de nos apprehensions à nostre premiere santé.

Mais, Madame, comme vostre cœur estoit esloigné de la verité de ces belles paroles, il a eu ce bon Prince, vostre langue, mais non pas vostre cœur. Ha ! Madame, il faut porter sur le front ce qui est en l'esprit, comme dit Plotin. Et comme le visage n'est qu'une ame racourcie, & comme son escusson à plusieurs quartiers, aussi il ne doit trahir, ny falsifier la bonté de nature, qui de son vray coing a imprimé nos naturels sur nos fronts mesmes. Et puis que nostre intelligence se conduit par la seule voye de la parole, ne peut-on pas dire que celuy qui la fausse trahit la société publique ? Si c'est le seul outil, par le moien duquel nos volontez se communiquent, & nos pensees, & le truchement de nostre ame, n'est-il pas vray, que quand il nous trompe nous ne nous tenons plus ? & que quand il nous deçoit, il deçoit tout.

nostre commerce, & dissout toutes les liaisons de nostre police?

-Voulez vous que ie le face voir, Madame, comme la parole a trompé, & nous, & ce grãd Prince! voulez vous que ie le monstre, comme nostre Arresté de paix de Sainte Manehou n'estoit composé de vostre costé que de piéces fausses, malicieuses, & artificieuses? Et pour commencer par le plus signalé monopole, qu'on a tramé pour altérer la gloire du dessein de ce Prince, n'est-il pas vray que le voyât cheri, & aimé de tous les bons François, pour le rendre odieux, & ruiner d'amitié, de credit, & d'autorité, on luy dressa calomnieusement ceste partie de Poictiers? on cria l'alarme, qu'il vouloit ce bon Prince partager cest Estât, ou plustost iouer au boute hors avec son ieune Roy: que chantoit autre chose cette leuee de boucliers, & ce voyage que le Roy fit à Poictiers? Poictiers, peuple mutin, peuple seditieux, tute sçais, vous le sçaez, venerable Prelat, qui auez esté le funeste fuzil de ce brasier? mais plus à plein vous le sçaez, prudent Philippeau, qui auez donné les memoires de cette batterie, & encore pour authoriser cette funeste tragedie, & attiter l'indignation des autres villes du royaume, on a chassé banni, exilé, & priué de leurs charges tant de gens de bien, tant zelez, & fideles Officiers, comme factieux & traistres au Roy & à l'Estat. Mais encore de quel front a-on peu si calomnieusement mettre en auant ce malicieux dessein? n'est-elle pas belle l'apparence? que ce Prince luy quinziésme apres auoir posé les armes, ait voulu prendre vne ville riche en
hommes

hommes, & des plus fortes du Royaume? Helas! que la posterité rira, quand elle lira ce subtil artifice, cette belle menée, cette leuée d'armes que lon fit, pour aller attaquer ce Prince defarmé, & en estat de suppliant, mais qu'elle fut belle la iustice qu'on luy rendit de ceste offence: Adieu honneur, adieu respect, adieu seureté de nos Princes puis que les affronts qu'on leur faict ont de l'honneur, de la gloire, & des bonnes pensions.

Mais encore quel malicieux artifice fut celuy duquel on se seruit à Bordeaux, ville capitale du gouuernement de ce Prince, pour le rendre odieux par toutes les villes de la Guienne? On fit accroire au peuple que ce Prince estoit arriué de nuit en leur ville, qu'il estoit caché en quelque maison: & que c'estoit pour monopoler contre leur liberté, & que par ainsi il falloit apporter promptement le remede à ce mal. Et tout aussi tost quelles recherches exactes ne fit-on pas dans les maisons de ceux qui ont l'honneur d'estre seruiteurs de ce Prince, & quels vacarmes ne fit-on au parlement, les Chambres assemblees? Et en fin apres ces recherches ne l'ayât peu trouuer, pour en estre esloigné de cent lieues ou plus, le Parlement desirant signaler sa prudence, ou plustost sa folie, prononça vn arrest memorable: à sçauoir que où ce prince se presenteroit pour entrer dás la ville que les portes luy seroyent refusees. N'est-ce pas vne belle suite de l'action de Poictiers? Et ce beau Parlement ne tient il pas de la maladie de son sage Prelat, comme le peuple de Poictiers de celle de l'Euesque? Ha! qu'elle a esté puissan-

re ceste annee paffee la constellation de nos bons Prelats, de nos bons pasteurs, puis que tant & tant de testes ont marché à la demarche & cadencé de leurs folies? Ha! Bordeaux, ha! peuple ingrat, est-ce ainsi que tu recognois l'honneur que tu dois à ton Gouverneur, à ton Prince? Est-ce ainsi que tu veux fuyr l'aspect de ce grand Soleil, pour estre priué de l'honneur & de la gloire que tu reçois de sa presence, comme la lune perd la lumiere qu'elle auoit du soleil, lors qu'elle fuit son aspect, & se iette dans les tenebres. Est-ce ainsi que tu deschires l'honneur de ce grãd Prince, apres en auoir receu tant de biensfaits, comme les Lybiens bruslēt la tige & le branchage du Ladanon, apres auoir cueilli la gomme aromatique? Et vous grand Parlement, qu'avez-vous fait, quel sinistre iugement avez vous donné sans charge contre l'innocence des actiōs de ce Prince, qui vous caressoit, qui vous honoroit, & vous cherissoit avec tant d'affection? Desbauchez, ouy, vous l'estiez par trop de l'esprit, i'en rougis, i'en ay honte, qu'une si grãde compagnie ait fait vn si grand pas de Clerc? Voyez maintenant si les intentions de ce Prince sont zeleees, puis que ce grand Senat, & grand Parlement de Paris espouse son party.

Et bien que ce bon Prince eust subiet de tirer raison de toutes ces offenses, toutesfois de peur de nous relancer en l'horreur de nos diuisions, aimamieux s'offēser soy mesme, que d'alterer le calme qu'il nous auoit donné, & gagné par cette charitable consideration, ne voulut autres armes que l'oubly, ny d'ambition, que de se rendre prés

de son Roy.

Mais comme ces meschans Agans ne se peuuent accrediter qu'en son absence, aussi s'opposerēt-ils long temps à son retour, & pour tesmoignage de ce desplaisir vous fistes, Madame, à leur persuation defense à la Noblesse d'aller au deuant, & de luy rendre l'honneur que sa qualité & ses bons seruices meritoient, & demandoient du deuoir d'un chacun.

Mais arriué que ce Prince fut, quels tesmoignages de bonne volonté n'avez-vous receu de son obeyssance? qu'avez-vous desiré qu'il n'ayt voulu? & qu'avez vous voulu qu'il n'ait executé? Vous avez desiré contre le traité de Sainte Menehoud la tenue des estats en la ville de Paris, & luy aussi. Mais perfidie par trop grande, c'estoit vn artifice pour tirer avec aisance, party des passions ruineuses des ennemis de nostre repos: vous voulustes qu'il ne parlast à l'ouuerture des Estats, comme il vouloit faire, pour faire voir le zelé motif de ses iustes intentions. Mais parce que le iugement de son zele seruoit de condamnation, de honte & de confusion à nos Bazanez, ce bon Prince qui ne mendie d'ailleurs que de soy-mesme des tesmoignages ny d'applaudissemens de ses actions, que de la complaisance & satisfaction de sa propre conscience, n'eust de langue que pour se taire. Et encores vous fistes defenses aux Deputez que si ce Prince se presentoit aux Estats pour parler, de rompre l'assemblée, de peur que les Deputez ne recogneussent l'ulcere de l'Estat, ainsi Minerue fauorisant le party des Grecs, pour leur donner l'aduantage retira Mars du combat

qui fauorisoit les Troyens : Ainsi les loups, dict Esope, demanderent les chiens pour plus facilement deuorer les agneaux. Ha ! pauvres Deputés, où est le courage, où l'honneur, où la liberté François ? quoy, craigniez-vous la langue de ce Prince ? Ses discours, il est vray, s'ont animez d'une force guerriere, mais plus guerriere que n'estoient ja lis les harâgues de Demosthene, qu'il appelloit sodats, d'un feu plus diuin que celuy qui sortoit de la bouche de Cacus ou de Sapho, d'une roideur, mais toute autre que n'auoient les discours de Pericles qu'on appelloit des foudres. Ils estoient, il est vray, à craindre, ces eloquens discours, & ces paroles massles; ouy, ils eussent rompu la trame des mal-heureux proiects de l'ennemy de cet Estat, & vous vous en fussiez retourné au lieu de la haine & indignation, que vous auez encouru du peuple, chargez d'amour, d'honneur & de gloire.

Mais encore, Madame, que diray-je, mais que ne dit tout le monde de la passion que vous eustes pour les bastonnades que ce Prince fit donner pour chastiment d'une trahison domestique ? n'auons nous pas veu l'esmotiō qu'on a voulu faire ? n'auons nous pas sceu cōme on a brigué la maison de ville, le Parlemēt, & les Estats donné au roy ce de testable aduis de se seruir del'Eglise, du couteau, & de la iustice, tous les discours qui se sont tenus a la sourdine, & comme en attendant un decret contre le sieur de Rochefort, on auoit resolu d'enuoyer deux compagnies du regiment des Gardes pour boucler son Hostel : resolution qui eust esté suiue de l'effect, si quelque bon Ge-

nie ne s'y fust opposé. Las!helas, Dieux tutélaires de ces sacrez Hostels, où est vostre respect? Ha! Madame, où sera la seureté, si elle n'est avec nos domestiques? Les prestres des Dieux, disoit vn certain, sont les plus seures gardes de leurs temples saincts & sacrez, & les seruiteurs les plus fideles gardiens des secrets & de la vie de leurs Maistres. Zopyre n'aimoit rien tant que son Xerxes, Ephestion que son Alexandre. Et tout au contraire, ce seruiteur perfide & desloyal, oubliât son deuoir & les bien-faiçts de son maistre, la vendu, l'a trahy, & pour vn leger chastiment qu'on a voulu prendre de ceste perfidie, vous auez donné l'essor à vostre passion, auez receu ce desloyal en la protection du Roy, & auez pourfuiuy le maistre cōme criminel de leze Maieité. Ha! Madame, cest effort qui fut faict à main armee par vn cadet de Gascogne à l'autorité de ce grād Parlement, & au mespris de l'obeissance de nostre ieune Roy ne fut pas si criminellement puny, la consideration de la cabale fut plus forte que l'interest de l'autorité du Roy, & seureté de l'Estat. Les assassins encore proiettez, resolu, & executez par vn coyon, & par vn estranger contre des Seigneurs signalez ont trouué leur couuert & leur impunité, & de bastonnades ont eu besoin d'abolition.

Et d'ailleurs, n'auons-nous pas veu comme ces lasches intendans, ialoux du bon accueil que ce grand Parlement fait à ce Prince, & du zele qu'il a voué au bien de la iustice, ont crié l'alarme, vous ont volontairement faict accroire que vous estiez à la veille d'estre depossedee, & par ainsi

qu'il luy falloit defendre à la premiere occasion l'entree au Parlement. Et ioignât les effects à ce mauuais dessein, sur l'aduis qu'ils eurent que les Chambres se doiuent assembler, vous en sçauiez, Madame, mieux que moy le subiect, vous enuoyastes sous le nom du Roy luy faire defenses d'aller au Parlement: & encore pour adiouster à ceste offense vn signalé affront, vous fistes boucler son Hostel de gendarmes. Ha! ie vois bien, ces meschans ne veulent pas de surueillans, on craignoit que ce Prince ne vist les registres du Parlemēt, qu'il n'y leust l'accusation de la femme qu'on sçait bien, & celle de Rauaillac: & en fin qu'il ne fust recognoistre à ce grand Parlement comme il a faict la verité du zele qu'il a vouié au bien de cet Estat.

Mais encore quel vacarme n'a-on faict, quel ruineux conseil n'a-on tenu, & quels monopoles n'a-on tramé contre ce Prince sur l'opinion que vous auez eüe qu'il auoit meu ce grand Senat, ce venerable Parlement de representer au Roy les ab^s de l'Estat, & les ruineux desseins que lon dresse à la grandeur de cette Monarchie? Et qui ne sçait, que si vostre vouloir eust secondé vostre pouuoir, & celuy de nos Bazanez, que ce bon Prince seroit desia dans la Bastillē. Vous y auez opiné tout haut, braue Dolé. Mais sçachez trestous que la capture d'un si grand Prince, mesmement en vne si grande innocence de ses actiōs ne passe pas aisement, ny sans solennelle consultation du ciel, que sa vie qui en couure tant d'autres, de qui tant d'autres vies dependent, & qui remplit tant de places, ne se desplace pas, comme

celle qui tient à vn simple nœud, & que ces ames
firares & exemplaires coustent plus à faire mou-
rir, qu'une ame populaire & inutile, & qu'il est
ce bon Prince si attaché à l'Estat qu'il n'en peut
sortir que tout ne se mette en pieces, non plus
qu'en ce bouclier admirable de Minerue, l'ima-
ge de l'ouurier ne s'é pouuoit tirer qu'en pieces.

Et tous ces autres Princes, & tous ces bons
Francois, qui avec ce grand Prince ont fait party
avec la grandeur de leur Roy, que vous ont-ils
fait Madame, & en quoy ont ils desservi le Roy
ou le public? dites-nous en la cause, comme vous
nous faites voir les effects de vostre indignation.
Ha! Madame, c'est trop presser & opprimer ces
glorieux Athletes de nostre gloire, c'est par trop
autoriser l'insolence indiscrete de ces Pigmées,
de ces auortons de fortune, qui crouassent en
corbeaux affamez, & abayent en chiens enragez
contrel'honneur de ces Braues, ne pouuâs cōme
aiglons bastards supporter les rayōs d'un si beau
Soleil. Ha! qu'il fait beau voir qu'un faquin pa-
ré des plumes estrangeres, qu'un lasche, qu'un
Pisandre vueille tenir le haut sur un Longueuille,
la gētillesse, la courtoisie, les delices de cet Estar,
& si courageux qu'il sera couronné comme iadis
le ieune Diomedé d'autant de Laurieres qu'il ré-
dra de combats. Qu'avez-vous resolu, Madame,
de faire de ce beau mignon? n'est ce point d'en
faire un vice-roy? ie le croy: car vaque une office
en la iustice, un benefice en l'Eglise, une place
en nos forteresses, à l'Anchre, à l'Ancre. Et mes-
mes depuis peu n'avez-vous pas osté Amboise à
ce grand Prince auât la closture des Estats mali-

cleusement, pour le donner à ce grand Marechal? Et puis, Madame, ne luy auez-vous pas destiné pour gendre vn Prince, vn fils de nostre grand Henry, de vostre bon mary? n'a-il pas luy seul plus de fiance que tous les Seigneurs & Princes du Royaume? & qui a tant de millions que nostre grand Henry nous auoit laillé? Qui? Tous ces deniers qui se sont leuez, & qui se leuent sur la sueur & sur le sang du pauvre peuple que ce beau mignon: mais encore n'est-ce pas le traicter en Roy, que de vouloir faire declarer ses ennemis criminels de leze Maieité, & les enuoyer à la Bastille, vous le sçauiez braue Longueuille, comme on vous a mis sur le tapis, vous le sçauiez aussi braue Nestor, Genereux Turenne, tout blanchy sous les signalez seruices que vostre zele a rendu au bien de cest Estat.

Et encore, Madame, que vous a faict ce grand Parlement pour l'auoir traicté avec tant de rigueur? Que dites vous Dolé? que dites vous Bul lion? qu'il faut enuoyer vos bons Seigneurs les vns en Grene, & les autres à la Bastille, vous osez vous si insolément esleuer cõtre ceux qui ont donné le poux & le mouuemēt à vostre fortune. Hel Madame, permettez vous qu'on diffame des personnes si sacrosainctes, & des Genies, & Dieux tutelaires de vostre autorité, & de vostre grãdeur? Il ya, vous dit ce grand Senat, des abus en l'Estat, des voleries aux finances du Roy, & del'excez aux subsides du peuple: est-ce vn crime, Madame de dire le vray? Si le peuple crie, & si tout crie, ne sera-il pas permis à la iustice de recueillir les larmes des suiets, & les presenter à son Roy pour
faire

faire replenir ces cris , & ces larmes en graces
& benedictions, comme le soleil rend à la terre
en pluye pour l'enrichir des fruides, les vapeurs
qu'il a tiré de la terre. Le temps, dites vous, n'est
pas propre pour corriger nos mœurs, & nos a-
bus: Mais Madame, ne donnez pas au siecle no-
stre de prauation, mais aux hommes de nostre sie-
cle, ne nous en deschargeons point sur le temps,
car ils s'ont en nous, & non en nos ans: Ne disons
point que c'est chose par trop difficile: ce n'est pas
parce que cela est difficile, que nous n'osons l'en-
treprendre, mais plustost parce que nous n'osons
pas l'entreprendre, cela est difficile. Mais combié
ay-ie meilleure opinion de vous, que vous mes-
me? Car ie dis que vous pouuez accomplir tout
cela avec vne grande gloire, mais que vous ne le
voulez pas: & que si vous en vouliez faire l'essay,
que vous le trouueriez en l'action mesme plus fa-
cile, que vous ne l'avez conceu: mais voulez vous
que ie die le vray? Nous auons honte d'appren-
dre a estre gens de bien. Et parce que ces bons
Princes, & ce grand Parlement recognoissent les
monopoles qu'on trame en faueur de nostre Ba-
zané contre la grandeur de ceste Monarchie, on
voudroit bien loger nos princes à la Bastille,
pour pouoir avec aisance, autoriser ce fune-
ste dessein.

Ha! Madame, ce siecle n'est pas vn siecle d'or,
mais vn siecle de fer: Car au siecle d'or de nos an-
ciens, le plus puissant vsoit avec moderation de
son autorité, n'auoit iamais volonté d'essayer
combien il estoit puissant a l'encontre de ceux
qui releuoient de sa puissance, ne conspiroit con-

tre la vie de son moindre: Aucun subiect aussi ne s'esleuoit contre son superieur, d'autant qu'on faisoit gloire d'obeyr à celuy qui commandoit bien:& puis aucun ne pouuoit estre plus puisſant, qui ne fust le meilleur. Au contraire, Madame, en ce siecle ce n'est que passion, que desfreiglement, que desbauche d'esprit, que desordre, que confusion, qu'opiniaſtreté à mal faire, nous sômes pluſtoſt rompus, que redressez: nous aimons mieux mourir avec nos vices, que les vices en nous. Nos testes, ie parle de nous autres qui manions l'Eſtat, ſont blanches au dehors, mais noires au dedans, la plus part de nous auons le poil, & l'autorité des vieillards, mais les vices des enfans, & ne sômes innocens que par ignorance. En ce premier ſiecle encore, le ſeruiteur ne ſe pouuoit esleuer cōtre l'enfant de la maison ſans estre criminel, ny luy refuſer l'hōneur, & le reſpect ſans estre ſeulement puny, parce que ce meſpris reiaillissoit à l'intereſt du pere. Et auioird'huy en vn grand Eſtat, en vn puisſant Royaume où les Roys & les Princes ſont dōnez de dieu, de petits coquineaux & des larrons pour ſe voir veillés par vn grand Prince, qui pour estre de la maison a part au reſentiment de ces ruinēs s'esleuent contre luy, & comme ces Geans bouffis d'orgueil & de preſōption conſpirent contre luy, & non ſeulement contre luy, mais contre tous les bons & fideles François. Helas! Madame, que l'aſſaſſinat entrepris ſur la perſonne de ce grand Mareſchal de Bouillon, de ce bon François, de ce fidele, & zelé ſeruiteur, crie. Et quoy? ſe peut-il faire, qu'en France, qu'en vn ſi grand Royaume les Roys, &

les bons françois ne pouuans mourir d'une belle main, ny d'une belle espece, soient tuez d'un coup de couteau? Je ne m'en estonne pas, Madame car vne iniure impunement receuë en appelle vne seconde, & la seconde vne troisieme, & ainsi de degré en degré iusques à l'infiny. L'impunité de la mort de ce grand Henry, de ce bon Prince autorise tous ces assassinats, qu'on proieté, & si on a entrepris sur le pere, si on conspire contre les Princes, croyez qu'on conspirera bien encore contre nostre ieune Roy. Je pleure, Madame, quand ie me represente, comme vous fistes rayer des cayers l'article qui portoit la recherche des auteurs du parricide de nostre Grand Henry.

Le temps ne permet pas, dites vous, de toucher ceste chorde. La femme qui est entre deux murailles vit encore, il y auroit du danger d'esbranlertout l'Estat. Helas! il faut bien croire donc que vous sçauiez que l'auteur est bien puissant. Mais si puissant qu'il soit, que craignez vous? Doutez vous, que comme tous les bons françois ont partagé aux trauaux, & à la gloire des triumphes de ce grand Roy, qu'ils n'ayent aussi tous part au ressentiment de l'assassinat commis en sa pesonne: Nous eussions, comme nous ferons encore, joint nos armes à celles que la douleur, & les iustes regrets vous deuoient faire prendre, nous eussions secouru vostre dueil de nos forces, & tiré vne pie vengeance de ceste cruauté. Ce grand Prince, Madame, vous le sçauiez, s'est offert, comme intéressé en cest assassinat, d'entreprendre ceste grande poursuite, & en eust tiré party si vostre ressentiment eust fauorisé son zele. Vous y auez résisté,

parce que, peut estre, ce coup eust rompu le dessein, qu'on a dressé aux ruines de ceste Monarchie. Plustost mourir, vous le deuiez, Madame, que de desnier, à l'amour que ce bon mary vous portoit, la vengeance de ceste perfidie: au moins il falloit faire quelque effort, puis qu'en ces si signalees occasions les efforts iustes sont necessaires: les necessaires, honnestes: & les honnestes des descharges de nostre deuoir

Que si les Princes crient, si les bons François, si la iustice, Ha! Madame, que le peuple crie bien plus encore, De l'issüe de nos beaux Estats, tout y a esté, vous le scauez, Madame, brigué, gaigné, corrompu. Les Deputez auoient tous les matins leur leçon par escrit, l'issüe aussi nous a fait voir que le remede est pire que le mal, Car qu'a on arresté, ny conclu, qu'une alliance d'Espagne, qu'une funeste ruine de la gloire de ceste Monarchie? Et encore on ne tient pas au peuple ce qu'on luy a promis, Car vous auiez promis aux Deputez d'abolir le droit annuel, vous l'auiez faict à la verité, mais dix iours apres vous l'auiez remis. Ha! qu'elle est bien gardee la foy publique. Vous auiez aussi promis la reuocation de tant de pensions inutiles, mais nous les augmentons tous iours, & surchargeons de plus en plus le peuple.

Et parce que nos bons Princes, ce bon Senat, & tous les bons François recognoissent, où vont ces pernicious desseings, ils aiment mieux mourir, Madame, avec de l'honneur que de suruiure par leur lascheté aux ruines de ceste Monarchie, comme ce bon citoyen Præneste, qui pouuant viure en la mort des Lebiés, aimä mieux mourir

avec eux. Cela est trop visible, que c'est à ce coup qu'on veut fleurdeliser nostre bon Bazané, nous le sçauons, comme le Chancelier a refusé le sequestre du Marquisat de Saluce, pour le faire donner à l'Espagnol: Nous sçauons qu'il fauorise le desseing, que ce mesme ennemy a sur Cleues, & sur le Piedmont, l'un pour nous mettre vne barriere entre les Holandois & les Allemans: & l'autre pour le faire Roy des Romains. Nous sçauons pourquoy on vouloit à ces Estats faire ordonner pour loy fondamentale, que nostre Roy releueroit du temporel de l'autorité de l'Eglise: nous voyons encore par trop, à quoy aboutit le desseing de ceste belle alliance: c'est, Madame, pour donner moyen à cest ennemy, de triompher de nos ruines: car par ce moyen tous nos alliez se départent de nos alliances. Et encor par malheur, afin qu'il se preuille de nostre desunion, on vous veut par le mescontentement du peuple, de la iustice, & de nos princes legitimes engager en des guerres ciuiles. Ha! Madame, il faut costoyer ce rocher, plus nous le recognoissons espouuantable, mieux nostre apprehension apprendra d'en fuyr le peril. Iason apres auoir semé les dents du Serpent, desquelles nasquirent ces gendarmes, ietta vne pierre au milieu d'eux, les fit esleuer les vns contre les autres, & à la fin entretenir, afin de rapporter paisiblement la roison d'or. Estouffons ie vous prie, le Serpent au berceau, n'attirons pas sur nous la malediction du peuple, & par apres l'indignation du ciel.

Ie crains, Madame, ie crains que si vous faictes par opiniastrété ce que vous ne deuez par raison,

& par passion ce que vous ne debuez entreprendre que par amour, que ces bons Princes forcez de lapuissance d'un charitable zele, la larme à l'œil, mille & mille sortes d'execrations contre les auteurs de ceste confusion, rascheront de repousser par la valeur de leurs espees la violence de ceste Passion. Ils retiennent, tant qu'ils peuuent, l'effor de ce grand mouuement. Nous sçauons leurs iustes intentions : & comme à ceste leuee d'armes que la mesme pitié leur auoit faict prendre, si tost qu'ils recogneurent, que plusieurs se vouloient mettre hors des gonds du debuoir, & cornoient la guerre, qu'aussi tost ces Braues, de ces petis commencemens iugeans quelle seroit l'issue de ceste confusion, en pilotes genereux tournerent teste vers la tempeste empescherent ces faux acords, qui vouloient troubler lharmorie de cet Estat, & soustindrent par leur prudence le bransle de toutel'Europe.

Que si auourd'huy, qu'à Dieu ne plaise, ils reprennent leurs glorieuses brisees : c'est, Madame, qu'au lieu d'un bon amendement tout a empiré, que les cris du peuple ont redoublé, & que les desseings de nostre ennemy sont sur le poinct de s'esclorre à la ruine de nostre repos. Ainsi puis que tous les bons François iettent les yeux sur eux, & l'esperance de leur allegement sur leur zele, & sur leur courage, ils ne pourront, Madame, ces braues Princes, desnier au public, & à leur ieune Roy, les effects de leur zele, Ouy braues Athletes, ie croy que comme vous estes le rempart de la grandent de vostre ieune Roy, & la seule tour d'airain, qui n'a peu estre percee par fon-

ce de l'or de Castille , que vous ioindez aussi à la grandeur de vostre zele le merite de vostre valeur. Et si c'est vn arrest du destin, que la gloire de cet Estat ne doive plus long temps fleurir , vous aurez au moins de l'honneur , que le fer de l'ennemy en soit la ruine, plustost que ses menees, & ses corruptiōs ; & s'il nous faut estre miserables, au moins il n'y aura point de crime de vostre part attaché à nostre malice.

Vous pouuez , Madame, vous pouuez avec aisance empescher ce desordre , & destourner l'orage de la ruine de nostre repos. Car puis qu'on vous chante si haut que l'Estat est vendu , que ce mariage est la planche sur laquelle de Madril on veut venir à Paris pour desthroner nos bōs Bourbons, & que ce venerable Parlement sçauant aux remedes de cette maladie a porté à vos pieds l'antidot & le preseruatif de ce venin, ne deuez vous pas pour vn temps faire halte à ce mariage : & cependant respondre aux Cahiers des Deputez, aux remonstrances du Parlement , & au mescontentement du peuple , afin que l'affection qu'on reconnoistra que vous portés au bien de cest Estat, vous acquiere , pour conquerir à nostre ieune Roy, ce que cet ennemy , auquel vous le voulez allier luy detient, autant de soldats & de Capitaines que vous en vouléz mettre sur pied pour nous perdre

Croyez, Madame, que si vous mesprisés les larmes du peuple, & la iustice des hōmes, que vous vous engagerez avec nous aux coups de la iustice du ciel. Les prieres sont filles legitimes de Iupiter, Elles ont cela de charitable, que quand elles sont

bien receuës de la personne à laquelle elles s'adressent, elles supplient Iupiter pour sa prosperité : au contraire cela de iuste, que si on ne les escoute ainsi qu'elles meritent, elles attirent l'ire de Iupiter, & le prouoquent à vne seuerë & violente vengeance.

Ceux qui ont le mesnage d'un grand Estat, en tous les grands & signalez actes, ausquels le bien public sert de premiere cause, doiuent fermer leurs yeux à leurs passions particulieres. Ainsi Agamemnon voyant que le Dieu Apollon estoit irrité contre les Grecs, à cause qu'il n'auoit voulu rendre la belle Criseïs à son pere, apres auoir faict rendre vn long combat à son amour, la rendit pour appaiser l'ire du ciel; *Si le conseil, disoit ce sage, a trouuë bon que Criseïs soit rendue, i'en y veux contr'uenir: car ie ne desire pas que mon plaisir particulier soit cause de la perte de tous ces Grecs,* Vous de uiez aussi, Madame, sur les plainctes & crieries qu'on fait, & sur les remonstrances de ce grand Parlement prendre cette genereuse resolution, & dire tout haut, Puis que ce venerable Senat ne trouue à propos de preferer l'alliance de l'Espagnol aux alliances de tous les Princes de l'Europe, & que ie perdray les bons amis de cest Estat, pour dōner le baiser d'amitié à celuy qui ne peut estre qu'ennemy de la France, ie les suiuray ces sages testes, ces fermes colonnes de la grandeur de cette Monarchie.

Et puis, Madame, vn grand courage ne s'allie iamais avec son ennemy. Ainsi Achille apres l'offense qu'il eust receuë d'Agamemnon, prié de s'appaiser & d'accepter le mariage de l'une de ses filles,

filles, le refusa aussi honorablement que genereusement. Le grand HENRY ennemy mortel de cest ennemy a eu aussi le courage si genereux que de ne vouloir l'alliance de ce superbe. Et quoy? n'heriterons-nous pas de son ressentiment aussi bien que de son courage? Sera-il dict que l'apprehension que nous auons de cest ennemy nous face rechercher son alliance, & qu'on donne à nostre lascheté le blasme d'auoir esté vaincus par nostre coyonnerie, ne le pouuans estre par le sort de nos armes? C'est bien raualler le merite du courage de ceste genereuse Noblesse Françoisé; Noblesse qui à sa seule demarche a tousiours fait trembler ses ennemis, & n'est iamais venuë aux mains avec cest ennemy de nostre grandeur, qu'elle n'ait eu plus de peine à luy donner la vie qu'à le combattre.

Et encore, Madame, si ce grand Agamemnon, si ce bon Roy donna pour victime à Diane courroucée sa fille, sa chere Iphigenie, pour rendre le vent fauorable à ses vaisseaux, & leuer les empeschemens qui les retenoit dans le port, & se chargeant seul du malheur tombé sur toute la Grece, aima mieux perdre sa propre fille que de voir plus long tēps ses suiets en peine. Si l'excez de l'amour qu'il portoit au public luy fit commettre vne espece d'inhumanité contre soy-mesme, l'amour, Madame, que vous deuiez au public, au Roy, & à l'Estat, deuroit contrepeser la passion que vous auez pour ce beau Marquis. Ha! Madame, bien que Didon eust enseuely toutes ses amours dans le mesme tombeau où elle enterra les cendres de son mary Sichée, toutesfois l'impudence Romaine n'eust point honte de le faire brusler, languir & mourir pour Enée. Vous deuiez, bien que

toute chaste, craindre ce mesme iugement, & pour oster tout subiet de soupçon vous despoüiller de ceste passion ruineuse, pour mettre à couuert vostre honneur d'un amour calomnieux, comme Vlysse se voyant sur le point de faire naufrage, despoüilla ceste belle robbe que Calypso luy auoit donnée. Croiez-moy, les Singes embrassent leurs petits pour les estouffer, & le lierre accolle la muraille pour l'aterrer. Vous deuriez encore, Madame, permettre la recherche des voleries des finances du Roy, des trahisons de l'Estat, & des conspirations qu'on fait contre nos Princes, afin que par vne pie vengeance, le ciel irrité contre nous, appaisast son ire & son indignation. Il n'y a, Madame, sacrifice plus agreable à Dieu que celuy d'un crime bien esgorgé.

Et parce que Dieu est irrité des crimes de ces particuliers, il faut que la France, cette pauvre France en general soit exposée au fer, & au tranchant, au sang, & au carnage. Il me souuient, Madame, auoir leu dans Homere, ce grand homme d'Estat, que Vulcan auoir graué deux citez sur les armes d'Achille, & qu'en l'une il n'y auoit que nopces, que festins, & que deuant l'autre deux armées estoient campees, ayans deux differens desseings: car l'une vouloit tout mettre au sang, & au carnage, & raser la ville à fleur de terre, & l'autre se contentoit de partager les biens & richesses de cette ville: Nous voicy, Madame, nous voicy au mesme estat, vous estes dans les nopces, dans les festins, tout retentit chez vous, de cris, de ioye, & d'allegresse. Mais tous les bons François sont dans les pleurs, dans les larmes, &

assiegez, si Dieu ne destourne l'orage, de deux armées de different dessein: car l'une a iuré la ruine de nostre repos, de nostre gloire, & de nostre grandeur, & l'autre poussée d'un charitable zele, & d'un saint amour qu'elle porte à son Roy, à l'Estat, & à sa patrie, se veut presenter pour partager, non nos despoüilles, mais nos malheurs, nos miseres & nos ruines. Et pour faire teste à l'orage qui nous menage, vous favoriserez la premiere, & nos bons Princes, comme des bons & fideles protecteurs de nostre bien & de nostre grandeur autoriseront la seconde. Vous sçavez bien, Madame, comme ces bons Princes ne sont point poussez à ceste genereuse action, pour vous obliger à donner à l'un de l'argent, à l'autre des charges, & à l'autre des forteresses. Vous sçavez, brave Villeroy, comme ce grand Prince à la conference que vous deüiez auoir avec luy, à Creil, vous dit tout courroucé, qu'il ne falloit pas mettre sur le tapis son interest particulier, mais celui du public, qu'il falloit satisfaire aux remonstrances de ce grand Parlement, & pour l'affermissement de la gloire de ceste Monarchie confirmer les alliances des Princes estrangers.

Et qui sera donc, si on en vient à la rigueur, le bon François, qui ne iointra son zele à la valeur de ces bons Princes, qui ne se representera avec eux au deuant des yeux la grandeur de nostre ieune Roy, & l'honneur de nostre patrie, qui ne s'armera de courage pour ne laisser perdre la gloire de ceste Monarchie. O François ! ô bons François la valeur du genereux sang de ceux d'où vous avez tiré naissance, le courage dont ils ont retrais-

ſe tant de fois cet ennemy de noſtre gloire, & le
 ſainct zele de nos Princes par vn gracieux appel,
 inuitent vos courages à ce champ d'honneur: ioi-
 gnez donc voſtre reſſentiment à celuy que la
 douleur des ruines de ceſt Eſtat leur fait auoir,
 ſecourez leur zele de vos forces, afin qu'avec vo-
 ſtre ayde ces braues releuent de ceſte prochaine
 ruine la grandeur de voſtre patrie: & la retirent
 de l'eſclauage de l'Eſpagnol, de ceſt ennemy de
 noſtre bien, de noſtre gloire, & de noſtre repos.
 Vous voila à la cadene, à l'eſclauage, & au premier
 iour à l'inquiſition: & qui pis eſt, vous verrez bien
 toſt ce glorieux nom de François, changé en Ca-
 ſtillan. Helas! ie pleure quand ie me repreſente
 que la paſſion de quatre ou cinq coquineaux, trai-
 ſtres à leur Roy, & deſerteurs de leur patrie, ſoit
 ſur le point de mettre ce grand Eſtat, ce florissant
 Empire en vne funeſte cendree. Et quoy? pour
 conſeruer le general, & pour authoriſer la gran-
 deur de noſtre ieune Roy, qui ne s'eſleuera con-
 tre ces penſionnaires d'Eſpagne, & ne s'armera
 de pierres pour lapider ces vendeurs de noſtre
 bien, & de noſtre liberté. O François! ou vous
 n'eſtes plus François, ou vous ferez voſtre party
 avec les bons François. I'ay honte, ie rougis en
 mon ame de voir, qu'on ait tant tardé à mettre la
 main à vne ſi glorieuſe & genereuſe execution.
 Ce ſont, direz-vous, Madame, les meſmes Offi-
 ciers qui ſeruoient le feu Roy. Ha! Madame, ia-
 mais Conchine ne poſſeda du viuant du feu Roy
 tant de belles & fortes citadelles, iamais il ne fut,
 ny officier, ny Marquis, ny Mareſchal: c'eſtoit vn
 petit hibou, qui ne paroiſſoit que la nuit: & au-

iourd'huy de la pouffiere, le voila esleué au ciel, le voila le premier Comedien de ceste funeste tragedie qu'on ioué sur le theatre de ceste Monarchie, & vn Dollé, vn Bullion, & tant d'autres, qu'estoient-ils, Madame du viuant du feu Roy? Ha! i'ay honte de le dire, mais plus grand'honte de les voir mesnager si traistreusement les deniers du Roy & du public. Et le Chancelier, Madame, n'estoit-il pas sur le poinct de receuoir vn bonnet rouge, si le feu Roy eust vescu encore quelques iours? Et ce Cadet de Gascogne, ce morfondu, qui n'a que des paroles de menaces: Et qui pour faire parler de luy veut faire vn coup de Gascon: Auoit-il le cœur, n'y l'oreille du Roy? & vsoit-il d'un Empire absolu, comme il fait aujourdhuy? L'honneur trop la memoire de ce grād Roy pour croire, que de son viuant vn Conchine, vn Dollé, vn Bullion, & tant d'autres latronneaux eussent eu voix en vn si grand Estat: Et qu'il ne reconnut, ce sage Roy, que ce Cadet couuoit en l'ame quelque funeste, & malheureux deslaing. Et par malheur, Madame, vous vous seruez de ceux, que le feu Roy ne voyoit que d'un œil, & encore d'un œil d'indignation: Ce sont ceux qui gouuernent l'Estat, partigent les finances, & se iouent de l'autorité de nostre ieune Roy. Ainsi, Madame, ne dites pas, que vous vous seruez des mesmes Officiers que le feu Roy, mais des ennemis de l'Estat, & de la patrie. Et encore, Madame, vous protegez l'impunité de leurs crimes: & ne voulez permettre que ce grand Parlement face recherche de leur vie. Et quoy? si le Roy doit la iustice au particulier, à plus fort raison au public: si vn sim-

ple l'arrecin merite la mort, à plus forte raison vne volerie des deniers du Roy, & du public : si vn simple homicide merite la chorde, à plus forte raison le cruel assassinat commis en la personne du plus grand Roy de l'Europe merite d'estre expié, non seulement par le sang, mais par le feu, & par les plus cruels tourmens d'vn Phalaris.

Et parce que ces bons Princes, les vrais enfans de la maison, voiaient traistreusement partager les despouilles de leur patrimoine, qu'ils en crient & en priué & en public, & qu'ils en demandent iustice, vous vous esleuez contre eux, les menacez d'vne Bastille, & encore les voulés faire dancier en vn temps de dueil, & en vn temps, auquel on a cōpromis de nostre gloire, & de nostre grandeur. Ha ! ce seroit vne lascheté par trop grande, & vne coyonnerie de Florence, de tourner le dos au danger, & le visage au vent & à l'orage : ferme il faut faire ferme, au besoin. Et où il y va de nostre liberté, il faut crier tout haut, de la vie ou de la mort, & apres auoir plaidé la cause par les larmes, la plaider par les armes. Ainsi, mes Princes, mes braues Princes, chers enfans d'vne mere que vous auez rousiours vniquement cherie, redouclez maintenant vostre zele, & vostre courage, embrassez la cause de vostre mere, de vostre partie, autorisez la grandeur de vostre ieune Roy : & affin que ce grād Estat ait son plein & son large, & que l'iniustice n'atire sur luy & sur vous l'indignation du ciel, prestez la main à la iustice, à ce grand Parlement, à ce venerable Senat : Vous estes assez puissant & assez forts. Car le Cyrus se croiqit assez forts, pourueu qu'il sou-

finist vne cause iuste. Helas ! puissans, que vous estes puissants, mes Princes, puis que vous soustenez la cause d'un ieune Roy, qu'on va insensiblement accabler, & protegez l'autorité de la iustice. Il ne faut pas aller d'un pied en vne action qui desire tant de courage, il ne faut pas imiter Sextius ce grand homme d'Estat, si vous ne voulez estre mocquez comme luy, qui saigna du nez, & perdit courage à moitié chemin d'une grande entreprise. Tout vous rit, tout vous ayme d'amour, le peuple vous ouure & les cœurs & les bras: Ainsi rompons ces traittes, qui ne sont que des pieges pour nous prendre, n'attendons de faire de nuict ce que nous pouuons faire de plein iour. L'occasion mesprisee, mes Princes, nous eschappe, comme la Pancarte s'esuanouit, si elle n'est soudainement tirée de terre.

Acheué d'imprimer ce huiictiesme d'Aoust 1615.

